

Lia rumantscha cun nova suprastanza

■ **(Ir/gad) La suprastanza da la Lia rumantscha (LR) ha già l'onn 2003 quindesch sesidas. La seduta avant Nadal è tranter auter stada deditgada a la midada da suprastanza che succeda sin l'entschatta da l'onn 2004.** Il president Jost Falett e la vicepresidenta Rita Kiliass-Cantieni bandunan la LR pervia da limitaziun d'uffizi sin la fin da l'onn. Las assessuras Rina Steier-Peduzzi e Mengia Mathis mettan a disposiziun lur mandat suenter sis respectivamain trais onns.

La nova suprastanza a partir dal schaner 2004 consista da:

- Vincent Augustin (Uniun Rumantscha da Surmeir) / president,
- Martin Cantieni (Renania),
- Men Janett (Uniun dals Grischs),
- Luzia Plaz-Sonder (Uniun Rumantscha da Surmeir) ed
- Erwin Vincenz (Romania).

La seduta da la suprastanza partenta ensemen cun ils novs suprastants è stada deditgada a l'introducziun tematica en la lavur ed ad ina curta revista davart ils davos tschintg onns.

Da menziunar sco projects pli gronds durant las duas davosas legislaturas èn: Scuntrada 2000, Expo.02, entschatta da l'analisi da las structures e strategias da la LR, En Lingia Directa, ediziuns Egls averts, Educaziun fisica, Istorgia Grischuna, project dal Fond naziunal cun l'università da Friburg davart ina grammatica rumantsch grischun, diversas amplificaziuns dal Pledari grond, nov concept per

la collavuraziun regiunala cun la fundaziun dal CCM Laax e dal PILC a Donat.

Sin il sectur da scola è la LR s'engaschada per il model da splitting en la scola professiunala da Glion, la scola bilingua Cuira, la maturità bilingua e la professura da Turitg. Per integrar meglier las conferenzas scolasticas en sias ponderaziuns ha la LR installà in gremi da cussegliaziun per dumondas da scola nua che tranter auter tut ils presidents da quellas èn represchentads.

Sin il sectur da la politica da linguas ha la LR fundà la Grupp rumantscha dal Cussegl grond. Ella è s'engaschada per la nova constituziun chantunala, la lescha federala davart las linguas naziunals, la votaziun davart ils dretgs politics. La LR ha plinavant collavurà en la «Grupp pressa rumantscha», sviluppà il palpieri «Rumantsch grischun – co vinavant?» e preparà in'istanza per novas finanzas.

Sch'ins vul ir pli fitg en detagl ha la

suprastanza per exempel già en quai temp 91 sedutas, dilucidà 686 tractandas e decidì da far 58 ediziuns – las bleras da quellas en ils idioms – e d'aderir a 286 dumondas da sustegniment per ediziuns ordaifer la LR, teaters, chant ed ulteriuras prestaziuns rumantschas.

La LR engrazia a tuts e tuttas ch'èn s'engaschads l'onn 2003 per lingua e cultura rumantscha e giavischa a l'entira Rumantschia unitad per avair forza l'onn 2004.



Quels che train il carr tar la LR: Martin Cantieni, Men Janett, Erwin Vincenz, Gion Antoni Derungs, Luzia Plaz-Sonder e Vincent Augustin (da san.).